

Script of Morning Gojri News Bulletin 01 October 2024 at 1015Hrs

مارننگ گو جری نیوز بلیٹن مورخہ 01 اکتوبر 2024

یوہ آکا شوانی جموں ہے محبوب سلطانی تین خبر سُنو۔

JK 3rd Phase

جموں کشمیر اسمبلی انتخابات غا تیجا تے آخری مرحلہ واسطے ووٹینگ جاری ہے۔ اس مرحلہ غے تحت 7 ضلعان بشمول با ریمولہ، کپواڑہ، بانڈی پورہ، اڈھم پور، کٹھوعہ، سانہ تے جموں غا 40 اسمبلی حلقان مانہہ ووٹ کھلیا جا ریہا ہیں۔ اس سلسلہ مانہہ 5 ہزار 60 پولینگ سٹیشنن غو قیام کیو گیو ہے۔ جن مانہہ 39 عشاریہ 18 تون متا ووٹر اپنا حق رائے دیہی گو استعمال کریں گا۔ ووٹینگ غو یوہ سلسلو شام 6 بجے تک جاری رہے گا۔ اس ضمن مانہہ اعلیٰ چناؤ افسر پانڈورنگ کے پولے نے دسیو ہے جے 9 بجے تک 11 عشاریہ 6 فیصد پولینگ درج کی گئی ہے۔ انہاں نے مزید دسیو ہے جے انتخابی پیش رفت واسطے تمام ضروری انتظامات کیا گیا۔ جن مانہہ حفاظت غا کڑا بندوبست غے نال نال دیگر شامل ہیں۔ اس مرحلہ غے تحت 4 سو 15 امیدوار انتخابی میدان مانہہ ہیں۔ جن غی سیاسی قسمت غو فیصلو اج 39 لکھ تون متا ووٹر کریں گا۔ تیجا تے آخری مرحلہ غے تحت کئی اہم سیاسی رہنما چناؤ میدان مانہہ ہیں۔ جن مانہہ کشمیر خطہ غا سابق نائب وزیر اعلیٰ مظفر حسین بیگ، بشارت بخاری، سجاد غنی لون، ناصر اسلم وانی شامل ہیں جد کہ جموں خطہ مانہہ دویندر سنگھ رانا، چودھری لال سنگھ تے رمن بھلا شامل ہیں۔ واضح رہے جے 18 تے 25 ستمبر مانہہ 2 مرحلہ غے تحت یوٹی مانہہ پہلاں انتخابات کرایا گیا ہیں۔ پہلا مرحلہ غے تحت 61 فیصد جد کہ دوجا مرحلہ غے تحت 57 فیصد ووٹینگ درج کی گئی تھی۔ تاہم تریاں مرحلاں گا ووٹان غی گنتری اسے مہینہ غی 8 تا ریخ نانہہ منعقد وے گی۔

CEC Appeal

جموں کشمیر اسمبلی انتخابات غا تیجا تے آخری مرحلہ غی ووٹینگ غو سلسلو اج جاری ہے۔ اس ضمن مانہہ اعلیٰ چناؤ کمشنر راجیو کمار نے لوکان تون اپیل کی ہے جے ویں خاصی تعداد مانہہ شرکت کر غے اپنا حق رائے دیہی غو استعمال کریں۔ جناب کمار نے لوکان نانہہ پہلا تے دوجا مرحلہ غے تحت ریکارڈ تعداد مانہہ ووٹ کھلن ور مہارکباد وی پیش کی۔ انہاں نے مزید کہیو جے پہلا دوئے مرحلاں غے تحت کسے وی جگہ تون بائیکاٹ تے دوبا رہے پولینگ خبر نہیں آئی ہے۔ اعلیٰ چناؤ کمشنر نے سماج غا ہر طبقہ تون تیجا تے آخری مرحلاں مانہہ ووٹ کرن غی اپیل کی ہے۔

Modi Message

وزیر اعظم نریندر مودی نے جموں کشمیر اسمبلی انتخابات غا تیجا تے آخری مرحلہ واسطے ووٹراں تون اپیل کی ہے جے بڑی تعداد مانہہ اپنا ووٹ غو استعمال کریں۔ سماجی میڈیا غی سائٹ ایکس ور انہاں نے لوکان نانہہ کہیو جے جمہوریت غا اس نظام نانہہ کامیاب بنان واسطے ویں اپنا حق رائے دیہی غو استعمال کریں۔ ان غو مزید کہنو تھو جے مینا اس گل ور بھروسو ہے جے نوجوان ووٹراں غے نال نال بڑی تعداد مانہہ خواتین ووٹر وی اپنا ووٹ غو استعمال کریں گی۔

Amit Shah

مرکزی وزیر داخلہ امت شاہ نے کہیو ہے جے مرکزی زیر انتظام علاقہ جموں کشمیر مانہہ ایسی سرکار غی ضرورت ہے جہیڑی خطہ مانہہ امن تے حفاظتی صورتحال نانہہ بحال رکھن واسطے فیصلو لے سکیں۔ اس ضمن مانہہ انہاں نے لوکاں توں اپیل کی جے وے جموں کشمیر مانہہ مجموعی ترقی، روزگار غا موقعہ پیدا کرن، تعلیم تے سیاحت واسطے تاریخی بدلاؤ غا حق مانہہ اپنا ووٹ غو استعمال کریں۔

Malik Arjun Kgarage

کا نگرہیس غا صدر ملک ارجن کھرگے نے جموں کشمیر اسمبلی انتخابات غا تیجا تے آخری مرحلہ واسطے تمام 40 اسمبلی حلقاں گا ووٹراں توں اپیل کی ہے جے ویں اس جمہوری حق غو بڑی تعداد مانہہ استعمال کریں۔ انہاں نے کہیو ہے ان لوکاں نانہہ سبق دکھان غو یوہ آخری موقعہ ہے جنہاں نے جموں کشمیر غا لوکاں توں ریاست غو درجو کھسیو ہے۔ انہاں نے کہیو ہے ہر اک ووٹ تھارا مستقبل نانہہ بہتر بنان غی طاقت رکھے۔ انہاں نے پہلی بار اپنا حق رائے غو استعمال کرن آلا ووٹراں توں اپیل کی جے ویں خاصی تعداد مانہہ اپنا ووٹ غو استعمال کریں۔

ECI Exit Poll

بھارتی چناؤ کمیشن غی طرفوں جا ری رہنما خطوط مانہہ تمام ذرائع ابلاغ غا چینلاں جن مانہہ برقیاتی، اشاعتی تے ڈیجیٹل میڈیا شامل ہیں غے نال نال پولیننگ ایجنسیاں تے تمام ہی لوکاں نانہہ کہیو ہے کہ جموں کشمیر اسمبلی انتخابات متعلق ایکڑٹ پول 5 اکتوبر 6 بجے توں بعد جا ری کیا جا سکیں گا۔ اس ضمن مانہہ ایکڑٹ پول بارے پابندی لوکاں غی نمائندگی بارے قانون 1951 غی سیکشن 126 اے غے تحت لانی گئی ہے۔ اس سلسلہ مانہہ اگر کوئی وی اس ضابطہ غی خلاف ورزی کرتو پایو گیو تاں اس ور قانون غے تحت کڑی کاروانی کی جائے گی۔ جموں کشمیر غا اعلیٰ چناؤ افسر غے نال نال ضلع چناؤ افسراں تے قانون نافذ کرن آلا ادارہ اس فیصلہ ور نزدیکی نظر رکھیں گا۔

School Timing

اسکولی تعلیم بارے ڈائریکٹوریٹ جموں نے جموں خطہ غا سرمائی زون مانہہ اسکولاں گا ویلاں مانہہ تبدیلی گو حکم دتو ہے۔ اس ضمن مانہہ دسیو گیو ہے جے جموں صوبہ غا سرمائی زون غے تحت آن آلا سرکاری تے نجی اسکولاں مانہہ اکتوبر مہینہ مانہہ 9 بجے اسکول لگیں گا تے 3 بجے چھٹی وے گی جد کہ پہلی نومبر توں جموں میونسپل کارپوریشن غا دائرہ کار توں علاوہ تمام اسکول 10 بجے لگیں گا جد کہ 4 بجے چھٹی وے گی۔ واضح رہے جے جموں میونسپل کارپوریشن غا دائرہ کار غے تحت آن آلا اسکولاں غو ویلو سویرے 9 بجے رکھیو گیو ہے جد کہ چھٹی 3 بجے کی جائے گی۔

New DGP

جموں کشمیر پولیس غا سابق ڈائریکٹر جنرل آر آر سوین غی سبکدوشی توں بعد سینئر آئی پی ایس افسر نلین پر بھات نے جموں کشمیر پولیس غا ڈائریکٹر جنرل غو عہدو سنبھال ليو ہے۔ ذرائع غے مطابق جناب پر بھات نے سوموار تے منگلوار غی درمیانی رات اس عہدہ غو چارج سنبھالیو۔ جناب پر بھات 1992 بیچ غا آئی پی ایس افسر ہیں جہیڑا کہ

آندرا پردیش کیڈر توں تعلق رکھیں۔ اپنی خدمات غے تحت 55 سالہ اس افسر نے 3 پولیس گلنٹری میڈل تے پراکرم پدک حاصل کیو ہے۔ جناب پربھات ناہہ دبشت گردی مخالف کا روائی کرن با رے جانیو جائے۔ اس تیں پہلاں وے انسپکٹر جنرل آپریشن تے کشمیر خطہ غا اڈیشنل ڈائریکٹر جنرل غا عہداں ور وی فائز تھا۔ منیو جا رہیو ہے جے اُن غی تعیناتی سنگ بھارت غا سب توں دقتاں آلا خطہ مانہہ امن و امان غی صورتحال ناہہ بحال رکھن مانہہ مدد ملے گی۔

اس غے نال ہی خبراں غو یوہ بلیٹن ختم ہوؤ۔